

MIKA

Outeur : **Mika**
Aan : **Israeliete**
Rede : **Oor hulle**
Geskryf tussen : **735-700 BCE**

Voorwoord.

Net soos sy tydgenoot Esaia het Mika in Juda verkondig dat IEUE sal oordeel en red. Hoogtepunte is die gedeelte oor die algehele vrede onder die heerskappy van Aleim en waarin Aleim se eise vir Sy volk opgesom word.

Oordeel oor Israhel en Juda.

1 Die woord van IEUE wat tot Miga, die Morastiet, gekom het, in die dae van Jotam, Agas, Hiskía, konings van Juda; wat hy gesien het aangaande Samaría en Jerusalem.

IEUE Aleim will getuie teen julle wees.

- 2 o Volke, luister almal saam! o Aarde en sy volheid, let op! Sodat IEUE Aleim getuie teen julle kan wees, IEUE uit sy heilige paleis.
- 3 Want kyk, IEUE gaan uit sy woonplek uit, en Hy daal neer en betree die hoogtes van die aarde.
- 4 En die berge smelt onder Hom, en die laagtes skeur oop, soos was voor die vuur, soos water wat langs 'n helling afstroom!
- 5 Dit alles vanweë die oortreding van Iakob en vanweë die sondes van die huis van Israhel. Wie is die oorsaak van die oortreding van Iakob? Is dit nie Samaría nie? En wie is die oorsaak van die hoogtes van Juda? Is dit nie Jerusalem nie?
- 6 Daarom sal Ek Samaría 'n puinhoop maak op die veld, 'n plek om wingerdstokke te plant; en Ek sal haar klippe in die dal laat afrol en haar fundamente blootlê.
- 7 En al haar gesnede beelde sal stukkend geslaan en al wat sy as hoereloon ontvang het, met vuur verbrand word, en al haar afgode sal Ek tot 'n verwoesting maak; want uit hoereloon het sy dit versamel, en tot hoereloon sal dit terugkeer.

- 8 Daaroor wil ek rouklaag en huil, kaalvoet en naak loop. Ek wil klae soos die jakkalse en treur soos die volstruise.
- 9 Waarlik, haar wonde is ongeneeslik; want dit het gekom tot by Juda, dit reik tot aan die poort van my volk, tot by Jerusalem.
- 10 Moet dit nie in Gat vertel nie, ween daar ganselik nie! In Bet-Ofra het ek my in die stof gewentel!
- 11 Trek weg in smadelike naaktheid, o inwoners van Safir! Die inwoners van Saānan trek nie uit nie. Die weeklagte van Bet-Haēsel sal julle daar die verblyf ontnem.
- 12 Want die inwoners van Marot wag in pyn op iets goeds, omdat onheil neerdaal van IEUE na die poort van Jerusalem.
- 13 Span die perde voor die wa, o inwoners van Lagis! Dit was die begin van sonde vir die dogter van Zion, dat die oortredinge van Israhel in jou gevind is.
- 14 Daarom moet jy 'n afskeidsgeskenk gee aan Moréset-Gat; die huise van Agsib sal 'n teleurstelling wees vir die konings van Israhel.
- 15 Nogmaals sal Ek jou 'n veroweraar bring, o inwoner van Marésa; die adel van Israhel sal tot by Adúllam kom.
- 16 Maak 'n kaalte op jou hoof en skeer jou weens jou troetelkinders; maak die kaalplek groot soos dié van 'n aasvoël, omdat hulle van jou af weggevoer is in ballingskap.

Wee die onderdrukker van die Arme.

- 2** Wee die wat onreg uitdink en kwaad smee op hulle bedde; by die môrelik voer hulle dit uit, want dit is in die mag van hulle hand.
- 2 Ja, hulle begeer velde en roof dit; ook huise en neem dit. So pleeg hulle dan geweld teenoor die man en sy huis, teenoor die mens en sy erfdeel.
- 3 Daarom, so sê IEUE Kyk, Ek bedink onheil teen hierdie geslag, waar julle jul nekke nie sal kan uittrek nie, en waarby julle nie regop sal kan loop nie; want dit sal 'n tyd van onheil wees!
- 4 In dié dag sal hulle 'n spotlied oor julle aanhef en 'n klaaglied sing Dit is gedaan—sal hulle

sê—ons is heeltemal verwoes; die eiendom van my volk laat Hy van besitter verander. Hoe neem Hy dit van my af! Aan die afvalliges deel Hy ons velde uit.

- 5 Daarom sal daar vir jou niemand wees wat die meetsnoer werp in 'n erfdeel in die vergadering van IEUE nie.
- 6 Moet nie profeteer nie! sê die valse profete. As 'n mens hieroor nie mag profeteer nie, sal die beskimping nie ophou nie!
- 7 Mag dit gesê word, o huis van Jakob Sou IEUE dan ongeduldig wees? Of is dit sy dade? Is my woorde nie vriendelik teenoor hom wat as opregte wandel nie?
- 8 Maar reeds vroeër het my volk vyandig opgetree. Julle pluk die mantel af, weg van die kleed van die wat in gerustheid verbygaan, wat afkerig is van oorlog.
- 9 Die vroue van my volk verdryf julle uit die huis wat hulle liefhet; van hulle kinders neem julle my sieraad weg in ewigheid.
- 10 Staan op en gaan heen! Want nie hiér is die rusplek nie, weens die onreinheid wat verwoesting aanrig, ja, 'n onherstelbare verwoesting.
- 11 As iemand wind nawandel en bedrieglik lieg en sê Ek sal vir jou profeteer by wyn en sterk drank—dan sou hy vir hierdie volk 'n profeet wees!
- 12 Gewis sal Ek jou geheel en al versamel, o Jakob! Gewis sal Ek vergader die oorblyfsel van Israhel; almal bymekaarbring soos skape in 'n kraal, soos 'n kudde in sy weiveld; en dit sal dreun van mense.
- 13 Die deurbreker sal optrek voor hulle uit hulle sal deurbreek en deur die poort intrek en daardeur uittrek; en hulle koning sal voor hulle uit gaan, en IEUE heeltemal vooraan.

Bose Regeerders en Profete.

- 3** Verder het ek gesê Hoor tog, o hoofde van Jakob en owerstes van die huis van Israhel! Betaam dit julle nie om die reg te ken nie?

- 2 Haters van wat goed is, en liefhebbers van wat sleg is, wat die vel van die mense aftrek en hulle vlees van hul gebeente;
- 3 en wat die vlees van my volk eet en hulle vel van hulle afslag; ook hulle gebeente verbrysel en hulle aan stukke kap soos vleis in 'n pot en soos vleis in 'n pan.
- 4 Dan sal hulle IEUE aanroep, en Hy sal hulle nie antwoord nie; maar Hy sal sy aangesig in dié tyd vir hulle verberg, omdat hulle verkeerde dinge gedoen het.
- 5 So sê IEUE aangaande die profete wat my volk verlei, wat as hulle maar iets het om met hulle tande te byt, vrede verkondig; maar teen hom wat niks in hulle mond steek nie, verklaar hulle 'n heilige oorlog!
- 6 Daarom sal dit nag word vir julle, sonder 'n gesig, en duister vir julle, sonder waarsêery; ja, die son sal oor die profete ondergaan, en die dag oor hulle verduister word.
- 7 En die sieners sal beskaamd staan, en die waarsêers sal bloos, en hulle almal sal die baard bedek, omdat daar geen antwoord van Aleim kom nie.
- 8 Ek daarenteen is vol krag, mét die Gees van IEUE, en reg en heldemoed, om aan Jakob sy oortreding te verkondig en aan Israhel sy sonde.
- 9 Hoor tog dit, hoofde van die huis van Jakob en owerstes van die huis van Israhel! Julle wat van die reg 'n afsku het en al wat reg is, verdraai;
- 10 julle wat Zion bou met bloed en Jerusalem met onreg!
- 11 Sy hoofde spreek vonnisse uit vir 'n geskenk, en sy priesters gee onderrig vir loon, en sy profete is waarsêers vir geld. Nogtans steun hulle op IEUE en sê Is IEUE nie in ons midde nie? Geen onheil sal ons wedervaar nie!
- 12 Daarom sal Zion om julle ontwil soos 'n land omgeploeg en Jerusalem puinhope word en die tempelberg bosrante.

Belofte van Heil en Seën in die Moseea Tyd.

- 4** En aan die einde van die dae sal die berg van die huis van IEUE vasstaan op die top van die

- berge en verhewe wees bo die heuwels, en die volke sal daarheen toestroom.
- 2 En baie nasies sal heengaan en sê Kom, laat ons optrek na die berg van IEUE en na die huis van die Aleim van Iakob, dat Hy ons in sy weë kan leer en ons in sy paaie kan wandel. Want uit Zion sal die wet uitgaan en die woord van IEUE uit Jerusalem.
 - 3 En Hy sal oordeel tussen baie volke en regsprek vir magtige nasies tot in die verte; en hulle sal van hul swaarde pikke smee en van hul spiese snoeimesse; nie meer sal nasie teen nasie die swaard ophef nie, en hulle sal nie meer leer om oorlog te voer nie.
 - 4 Maar hulle sal sit elkeen onder sy wingerdstok en onder sy vyeboom, sonder dat iemand hulle verskrik; want die mond van IEUE van die leërskaie het dit gespreek.
 - 5 Want al die volke mag wandel elkeen in die naam van sy god, maar óns sal wandel in die Naam van IEUE onse Aleim vir ewig en altoos.
 - 6 In dié dag, spreek IEUE, wil Ek versamel die wat kreupel is, en bymekaarmaak wat verdryf was, en die wat Ek kwaad aangedoen het.
 - 7 Dan sal Ek die wat kreupel was, tot 'n oorblyfsel maak en wat ver verwyder was, tot 'n magtige nasie. En IEUE sal koning wees oor hulle op die berg Zion, van nou af tot in ewigheid.
 - 8 En jy, Skaapstoring, Heuwel van die dogter van Zion, na jou sal dit kom, ja, die vroeëre heerskappy sal kom, die koningskap vir die dogter van Jerusalem.
 - 9 Waarom skreeu jy nou so hard? Is daar geen koning in jou nie? Of het jou raadgewer omgekom, sodat smart jou aangegryp het soos van een wat baar?
 - 10 Krimp inmekaar en bring voort, o dogter van Zion, soos een wat baar! Want nou sal jy die stad verlaat en op die veld gaan woon; en jy sal in Babel aankom—dàar sal jy gered word, dàar sal IEUE jou verlos uit die hand van jou vyande.
 - 11 En nou is daar baie nasies teen jou versamel wat sê Laat haar ontheilig word, en laat ons oë met welgevalle neersien op Zion.

Hulle ken nie die Gedagtes van IEUE nie.

- 12 Maar hulle ken nie die gedagtes van IEUE nie en verstaan nie sy besluit nie, dat Hy hulle versamel het soos gerwe op die dorsvloer.
- 13 Staar op en dors, o dogter van Zion! Want Ek sal jou horing yster maak en jou kloue koper, en jy sal baie volke fyn trap; en jy sal hulle onregverdige wins aan IEUE toewy en hulle rykdom aan IEUE van die ganse aarde.

Die Mosea sal gebore word in Bethlehem.

- 5 Nou sal jy by hope bymekaar moet kom, o dogter van krygsbendes; die vyand het 'n wal teen ons opgegooi; met 'n stok slaan hulle die regeerder van Israhel op die kakebeen.
 - 2 En jy, Betlehem Éfrata, klein om te wees onder die geslagte van Juda, uit jou sal daar vir My uitgaan een wat 'n Heerser in Israhel sal wees; en sy uitgange is uit die voortyd, uit die dae van die ewigheid.
 - 3 Daarom sal Hy hulle prysgee tot op die tyd dat 'n barende gebaar het. Dan sal die oorblyfsel van sy broers saam met die kinders van Israhel terugkeer.
 - 4 En Hy sal optree en hulle laat wei in die sterkte van IEUE, in die majesteit van die Naam van IEUE sy Aleim; en hulle sal rustig woon, want nou sal Hy groot wees tot aan die eindes van die aarde.
 - 5 En Hy sal vrede wees.
- Wanneer Assur in ons land kom en hy ons paleise wil betree, sal ons teenoor hom sewe herders stel, ja, agt vorste uit die mense.
- 6 En hulle sal die land Assur met die swaard afwei en die land van Nimrod by sy ingange. So sal Hy ons dan van Assur bevry, wanneer hy in ons land kom en ons grondgebied betree.
 - 7 Dan sal die oorblyfsel van Iakob onder baie volke wees soos dou van IEUE, soos reënbuie op die plante, wat op geen mens wag nie en ter wille van geen mensekind vertoef nie.
 - 8 En die oorblyfsel van Iakob tussen die nasies sal onder baie volke wees soos 'n leeu onder die diere van die woud, soos 'n jong leeu onder

trope kleinvee; wat, as hy deurtrek, vertrap en verskeur sonder dat iemand red.

- 9 Jou hand sal bo jou teëstanders verhewe wees, en al jou vyande sal uitgeroei word.
- 10 En in dié dag, spreek IEUE, sal Ek jou perde uit jou midde uitroei en jou strydwaens vernietig.
- 11 Ook sal Ek uitroei die stede van jou land en al jou vestings afbreek.
- 12 Verder sal Ek uitroei die towerye uit jou hand, en jy sal geen goëlaars meer hê nie.
- 13 En Ek sal uit jou midde uitroei jou gesnede beelde en jou klippilare, sodat jy jou nie meer voor die werk van jou hande sal neerbuig nie.
- 14 En Ek sal uit jou midde uitruk jou heilige boomstamme en jou stede verwoes.
- 15 En Ek sal in toorn en grimmigheid wraak neem op die nasies wat nie geluister het nie.

Aleim twis met Isrhael.

6 Hoor tog wat IEUE sê

Staan op, twis in teenwoordigheid van die berge, en laat die heuwels na jou stem luister!

- 2 Hoor, berge, die twis van IEUE! En onwankelbares, grondslae van die aarde! Want IEUE het 'n twis met sy volk en sal met Isrhael 'n regsgeging hou.
- 3 My volk, wat het Ek jou aangedoen, en waarmee het Ek jou vermoei? Antwoord My!
- 4 Ja, Ek het jou uit Egipteland laat optrek en jou uit die slawehuis losgekoop, en Ek het voor jou uit gestuur Moses, Aäron en Mirjam.
- 5 My volk, dink tog aan wat Balak, die koning van Moab, beraadslaag het, en wat Bileam, die seun van Beor, hom geantwoord het, en wat gebeur het van Sittim af tot by Gilgal, sodat jy kennis kan dra van die regverdige dade van IEUE.
- 6 Waarmee sal ek IEUE tegemoetgaan en my buig voor die hoë Aleim? Sal ek Hom tegemoetgaan met brandoffers, met jaaroud kalwers?
- 7 Sal IEUE 'n welbehag hê in duisende ramme en tien duisende strome van olie? Sal ek my

eersgeborene gee vir my oortreding, die vrug van my liggaam vir die sonde van my siel?

- 8 Hy het jou bekend gemaak, o mens, wat goed is; en wat vra IEUE van jou anders as om reg te doen en liefde te betrag en ootmoedig te wandel met jou Aleim?
 - 9 Die stem van IEUE roep tot die stad—dit is heilsaam om u Naam te vrees
- Hoor die roede, en wie dit bestel het.
- 10 Is daar nog altyd in die huis van die goddelose skatte van onreg en 'n skrale efa wat vervloek is?
 - 11 Sal Ek rein kan wees by 'n valse weegskaal en by 'n sak vol bedrieglike gewigte?
 - 12 Want die rykes in die stad is vol geweld, en die inwoners daarvan spreek leuentaai, en hulle tong is bedrog in hulle mond.

- 13 So slaan Ek jou dan ook met 'n smartlike wond, met verwoesting weens jou sondes.
- 14 Jy sal eet, maar nie versadig word nie, sodat jou honger in jou binneste bly; en jy sal wegbring sonder om iets te red; en wat jy red, sal Ek aan die swaard oorgee.
- 15 Jy sal saai, maar nie maai nie; jy sal olywe uittrap, maar jou nie met olie salf nie, en mos maak, maar geen wyn drink nie.
- 16 Want die insettinge van Omri word onderhou en al die werke van die huis van Agab; en julle wandel ooreenkomstig hulle planne, sodat Ek jou tot 'n woesteny sou maak en die inwoners daarvan 'n bespotting en die smaad van my volk sal julle dra.

Aleim sal vir Isrhael Vergewe.

- 7 Wee my, want ek het geword soos ná die insameling van somervrugte, soos die natrossies van die wynees geen tros om te eet nie, my siel begeer vroeë vye.
- 2 Die vrome het verdwyn uit die land, en daar is geen opregte meer onder die mense nie; hulle loer almal op bloed; hulle jaag elkeen sy broer met die net.

- 3 Na die kwaad gaan die hande uit, om dit dapper te doen. Die vors eis, en die regter vra betaling, en die groot man spreek die begeerte van sy siel uit, en hulle verdraai dit alles.
- 4 Die beste van hulle is soos 'n doringstruik, die mees opregte erger as 'n doringheining. Die dag van jou wagte, jou besoeking, kom; nou sal hulle verwarring daar wees.
- 5 Vertrou geen metgesel nie, maak op geen vriend staat nie, let op die poorte van jou mond teenoor haar wat in jou skoot lê.
- 6 Want die seun minag die vader, die dogter staan op teen haar moeder, die skoondogter teen haar skoonmoeder, die man se vyande is sy huisgenote!

Maar ek sal uitsien na IEUE.

- 7 Maar ek sal uitsien na IEUE, ek wil wag op die Aleim van my heil, my Aleim sal my hoor.
- 8 Wees nie bly oor my nie, o my vyandin! Al het ek geval, ek staan weer op; al sit ek in duisternis, IEUE is 'n lig vir my.
- 9 Die toorn van IEUE sal ek dra, want ek het teen Hom gesondig; totdat Hy my saak verdedig en my reg verskaf. Hy sal my uitlei in die lig; ek sal met welgevalle sien hoe Hy geregtigheid oefen.
- 10 Ook sal my vyandin dit sien, en skaamte sal haar bedek wat vir my sê Waar is IEUE, jou Aleim? My oë sal met welgevalle op haar neersien. Nou sal sy vertrap word soos modder van die strate.
- 11 Daar kom 'n dag om jou mure te herbou! In dié dag sal die gebied ruim wees.
- 12 Dit is 'n dag dat hulle na jou sal kom van Assur en die stede van Egipte, en van Egipte tot by die Eufraat, en van see tot see, en van berg tot berg.
- 13 Maar die aarde sal 'n wildernis word vanweë sy inwoners, as gevolg van hulle handeling.
- 14 Wei u volk met u staf, die kudde wat u erfdeel is, wat afgesonderd woon in 'n bosveld op Karmel; laat hulle wei in Basan en Gilead soos in die ou dae.

- 15 Soos in die dae van jou uittog uit Egipteland sal Ek hom wonders laat sien.
- 16 Die nasies sal dit sien en skaam wees ondanks al hulle krag hulle sal die hand op die mond lê, hulle ore sal doof word.
- 17 Hulle sal stof lek soos die slang, hulle sal soos grondkruipers bewende uit hulle vestings te voorskyn kom, hulle sal sidderende kom na IEUE onse Aleim, en hulle sal vir U vrees.
- 18 Wie is 'n Aleim soos U, wat die ongeregtigheid vergewe en by die oortreding van die oorblyfsel van sy erfdeel verbygaan?

Hy hou toorn nie vir ewig vas nie, maar het 'n welbehag in goedertierenheid.

- 19 Hy sal Hom weer oor ons ontferm, ons ongeregtighede vertree; ja, U sal al hulle sondes in die dieptes van die see werp.
- 20 U sal trou bewys aan Iakob, goedertierenheid aan Abrahams, wat U aan ons vaders met 'n eed beloof het sedert die dae van die voortyd.